

AKASHVANI AIZAWL

REGIONAL NEWS BULLETIN

Date – 24/03/2026 Time - 18:30 -18:40Hrs

HEADLINES ( EVENING )

- Vawiin hi Ngawr Hri umbo tura beihpui thlakna ni, World TB Day pualin Mizoram hmun hrang hrangah hun hman a ni.
- Kum 2026–2027 sikul kumthar atana SCERT-in a buatsaih School Textbook-te siam leh sem chhuah hna chu a hun takah zawh fel a ni a, District tinah thlen hman vek a ni.
- Prime Minister Narendra Modia chuan West Asia-a remna leh muanna a awm theih nan inbiakna leh indawrna neih a tul thu a sawi.
- Supreme Court chuan Hindu, Sikh emaw Buddhist te chauhin Scheduled Caste nihna an nei thei tiin thutlukna a siam.

<><><>

WORLD TB DAY

Vawiin hi Ngawr Hri umbo tura beihpui thlakna ni, World TB Day a ni a, he ni pual hian Health Minister Pi Lalrinpuii chuan TB natna um bo turin mi zawng zawng a sawm a ni.

(Minister BYTE)

Vawiin khan MINECO a Taxation Auditorium ah World TB Day pual hian hun hman a ni a, NHM Mizoram Director Dr R. Lalchhuanawma chuan he hun hi a hmanpui a ni.

Dr R Lalchhuanawma chuan TB natna umbo kawngah Mizoram dinhmun chu a tha hle a ti a, sorkar laipui ina TB um bo na tura a hmalakna TB mukt bharat abhiyan hnuaiyah khaw tina TB vei awlsam bik tura an ngaih te hming chhinchhiah chhuah vek niin a thlawnin screening neih thin a ni a ti a, mihring awmkhawm tamna thin jail leh home ah te pawh endikna neih thin a ni bawka ti.

Kan corr report ngaithla ang.

*Dr R Lalchhuanawma sawi danin, Ram pumpui chu TB awmlahna a siam tura tih a nih angin thingtlang khua ah te bul tan a ni a, in elna thianglim siam thin a ni*

*a, tun dinhmun ah hian TB free village – TB awmlohna khua puan theih hi khaw 150 lai awmin heng zingah hian khaw 74 te chu kum khat atana TB free village ni thei an ni a, khaw 58 te kum hnih chhunga a zawna TB free village an ni a, khaw 18 te chu kumthum chhung tb free village an lo ni tawh a, Aizawl district chhungah bik chuan TB free village ni thei hi khaw 19 an ni a.*

*TB free village hmalakna kawngah hian VC te hi an mawhphurhna pawimawh tak an nei tih sawiin TB dona atan plan tha tak neiin nasa tak mipui te tanpuina kawngah hma an la thin a ni a ti bawk .*



## LAWNGTLAI TB

Tukin khan Mizoram State TB Control Society ruahmana angin Lawngtlai Areopagy ah World TB day hmanna leh 100 Days Campaign hawna neih a ni a, Bawrhsap Pu Donny Lalruatsangan telpuun, LADC CEM Pu C Lalsawmzualan he hun hi a hmanpui.

Kan corr report ngaithla ang.

*TB Senior Treatment Supervisor Pu James Zarzoliana tarlan danin, nikuma 100 DAYS campaign kalpui anih hnu in Lawngtlai District ah TB vei -15 hmuh chhuah belh a ni a, Ei leh in that loh avanga TB vei a tam ber an ni a ti. 100 Days Campaign- Second phase kalpui a ni leh dawn a, Village zawnzawngah screening neih vek tur a ni a. TB Centre ah hian entik lai pawh in a test thei a ni. Kum 2023-ah TB vei mi 108 awmin, 108 in damna an chang a, Kum 2024-ah TB vei mi-119 awmin mi- 2 in nunna an chan a, mi- 117 in damna an chang a, Kum 2025-ah TB vei mi-162 awmin, mi- 1 in nunna a chan a, mi- 95 damna an chang a, mi-67 enkawl lai an awm a, Kum 2026-ah mi-26 damna chang an awm a ni.*

*Vawiin World TB Day hmanna ah hian Khuallian chuan '100 Days Campaign' a hawng a, TB umbo leh enkawlna kawnga thawh hlawkte 'Certificate of Recognition'. hlanna neih niin, Pi Lalrohli, Thingkah- TB vei damna chang in thutawi a sawi a ni.*



## SERCHHIP TB

Serchhip DC Pisapui Hallah ‘Yes! We can end TB! tih thupui a hmangin ‘World TB Day’ hman a ni a, Serchhip Sr.CMO Dr .L.P Malsawman kaihruaiin, Serchhip Bawrhsap Pu Paul L.Khuma chuan he hun hi a hmanpui a ni.

District TB Officer Dr.Lallawmkimi Chhakchhuak chuan Serchhip District a TB dinhmun leh District chhung khaw 23 TB Free Village a hmalakna kalpui dan tlangpui sawiin, tun dinhmunah Serchhip District chhung khaw 12 ah TB vei mek mi 41 an awm a, TB dona kawng a hma la tha leh TB vei awm loh na khua khawtlang hruaitute te chawimawina Medal hlan annih bakah, Nikshay Mitra (Nutritional Support) Donor te hnenah chawimawina thuziak hlan an ni bawk.

TB vei te ei tur pekna tur pawisa thawh zingah hian mi 13 tana thawhtu bialtu MLA, CM Pu Lalduhoma pawh a tel a ni.



## SCHOOL TEXT BOOKS

Kum 2026–2027 sikul kumthar atana State Council of Educational Research and Training (SCERT)-in a buatsaih School Textbook-te siam leh sem chhuah hna chu a hun takah zawh fel a ni a. Academic Session tan hmain Textbook-te hi Samagra leh Textbook Dealer-te hnenah hlan nghal vek a ni a, District zawng zawnga zirlaite hnenah sem a nih theih nan Mizoram chhunga District tinah heng zirlaibute hi thlen hman vek a ni bawk.

Sorkar thuchhuah tarlan danin, SCERT School Textbook siam hna hi Department of Information & Public Relations, Printing & Stationery (IPRP&S) hnuaiia Directorate of Printing & Stationery kuta awm a ni a, he hmalakna hi School Textbook Quality siamthatna kawngah hmalakna thar pawimawh tak a niin Textbook Cover Lamination pawh tih tel chhoh a ni ta a. Hei hi a hmaa tih ngai loh a ni a, a hma aiin a senso sang deuh mahse; zirlaite tana hman tlak leh deih rei zawk tur a a nih avangin; a tangkai hle a ni, an ti.



## MZP

Mizo Zirlai Pawl (MZP) chuan Mizoram rawn tlawhtu khualzin te chu Mizo hnam, sakhua leh khawtlang thil an thehdarh kawng a fimkhur turin an chah.

Vawiin khan MZP hian thuchhuah siamin, Mizoram rawn tlawhte'n a social media leh thil dang danga thehdarh tur digital content an siamte hian Mizo hnam, sakhua leh khawtlang timualpho thei tur chu siam lo turin a chah a. Mimal in leh biakinahte video emaw thlalak pangngai emaw pawh ni se, phalna nei lo chuan pawng lak mai mai lo tur leh Tourist Mizoram la rawn tlawh leh zel tur te pawhin, Mizo min hmuh dan a dik lo zawnga a hruai theihna tur thilah phei chuan fimkhur hle turin an hriattir a ni.

MZP chuan khualzinte chu Mipui nawlpui awm dan leh nunphung pangngai aia uchuakin khawiah pawh awm lo turin a ngen a. A bikin sakhaw hmuh leh biakinte hi zah a, Mizo hnam leh nunzia te zahin, Mizo mipuite mit ti kham lo zawnga awm turin khualzinte a chah bawk a ni.

Hmeichhia leh hmeichhe naupangte chu an thla emaw video emaw la a, mi ngaihndan hruai kawi thei tur zawnga pholan te chu MZP chuan a duh lo a. Khawlai ilo a hmuh remchan apiang kawm a, Mizo chanchin a hlulang zawng leh kimchang lo thehdarh zui pawh a rem ti lo a ni. Mizo chanchin ngaihven leh hre chiang duh chuan thil hre zik tluak leh puitling deuh te atanga thil ngaihven hram hram turin khualzinte a ngen a ni.



## LAWNGTLAI –CM AWARDEE

Auto Rickshaw Driver rinawm, a Auto Rickshaw a pawisa tamtak theihngihl, a neitu hnena kimtaka pelettu, Henry Lalhmingmuana, Lawngtlai-III chu vawiin khan Lawngtlai DC Office chuan Chawimawina thuziak leh Pawisa fai an hlan.

Henry Lalhmingmuana chawimawina hlanna hi DC Office Chamber ah neih niin, Lawngtlai DC Pu Donny Lalruatsanga chuan Lawngtlai District chhungah m irinawm, Chief Minister Chawimawina Nopui dawng thei an nei chu chhuanawm a tih thu sawiin, Henry Lalhmingmuana rinawmna chuan Lawngtlai District mai nilovin, Mizote chhuanawm leh mawi zawngin rampumah a than phah a ti a, Lawngtlai DC Office chuan Henry Lalhmingmuana rinawmna chu a ngaihluin a chhuang takzet a ni, a ti.

Henry Lalhmingmuana chuan DC Office in a beisei leh rinphaklohva chawimawina an hlan chu lawmawm a tih thu a sawi a, khami tum, a Auto Rickshaw a pawisa an theihngihl chauh kha nilovin, tumdangah pawh a passenger ten theihngihl an neihin a theih ang angin a zawnchhuah thin thu a sawi.

Kum kalta 2025 June 19 zan khan Henry Lalhmingmuana hian Lawngtlai Bazar Veng atangin zan dar 9 vel ah Rakhine lam mi, sumdawng chu Hotel Husop, Assam Rifle Camp bul, Lawngtlai-III ah thlahin, a passenger hian pawisa a theihngihl tih Henry-a hian In a thlen hnua a Lirthei a enfelna ah a hmua, a tuamna Polythene chu a tet vangin pawisa a ni tih a hre nghal a, a neitu a zawng chhuaka, kimtakin a pelet a bu. Hemi tuma pawisa theihngihl, himtaka peklet hi a vaiin Cheng Nuai 15 leh Sing 5 a ni.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### VARTALAP

Press Information Bureau (PIB), Aizawl bultumin vawiin khan Champhai Press Club-ah "One Day Media Workshop "VARTA" on Viksit Bharat - Guarantee for Rozgar and Ajeevika Mission (Gramin) and National AIDS & STD Control Programme" tih hun buatsaih a ni a, Champhai Bawrhsap Pu Mohammad Aaquib bakah Mizoram Journalists Association (MJA) Champhai President Pu Lalhlupaia leh MJA Khawzawl President Pu Lalrotluanga Ralte ten he hun hi an hmanpui a ni.

He workshop ah hian G RAM G Act 2025 chungchang leh MGNREGA nena a inan lohna te leh a danglam dan hrang hrang, mipui tana hmasawmna awm tur te mithiam ten an sawi a. National AIDS & STD Control Programme chungchang

District AIDS Prevention & Control Unit atangin District Programme Manager Pu Lalthlamuana Ralte chuan sawiin HIV leh AIDS awmzia te, inkai chhawn theih dan leh kawng hrang hranga inkai chhawng zat te, Mizoram leh Champhai kai awm zat te leh hriat tur tul hrang hrang a sawi a ni.

<><><>

PM

Prime Minister Narendra Modia chuan West Asia-a remna leh muanna a awm theih nan inbiakna leh indawrna neih a tul thu a sawi. Vawiin khan Rajya Sabha-ah West Asia buaina chungchang leh India ngaihndan sawichhuakin Pu Modia chuan India chuan inepna boruak sang zel tihziaawm a duh ber thu leh Strait of Hormuz hawn chu a ngaihpawimawh anih thu a sawi a. West Asia-a buaina a chhuah atangin Gulf ram hruaitute nen telephone hmanga an inbiak pawh reng thu sawiin hei bakah hian Iran, Israel leh United States te pawh a biak thu a sawi a ni.

<><><>

SC

Supreme Court chuan Hindu, Sikh emaw Buddhist te chauhin Scheduled Caste nihna an nei thei tiin thutlukna a siam. Vawiin khan Supreme Court chuan he thutlukna hi siamin Kristian emaw sakhaw dang emaw a inlet te chuan chawp leh chilhin Scheduled Caste dinhmun an luah mek chu an hloh nghal a ti. Andhra Pradesh High Court thutlukna pawmpuiin Supreme Court chuan tupawh Kristiana a inleha an rindan leh sakhaw thilte a tih ve chuan Schedule Caste member-a ngaih theih an ni tawh lo a ti. He thu hi Justice P.K Mishra leh Manmohan te awmna bench chuan a ngaihtuah a. Dalit zinga Kristiana inlette chuan Scheduled Castes and Scheduled Tribes (Prevention of Atrocities) act in venhimna a pek te an dawng thei tawh lo ang tiin an rel a ni.

<><><>